



Broj:
Sarajevo, 22.08.2023. godine

PRIMLJENO: 22-08-2023			
Organizaciona jedinica	Klasifikaciona oznaka	Redni broj	Broj priloga
01-	02-2	1831	23

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM
n/r predsjedavajućeg

Predmet: Prijedlog rezolucije o sprječavanju svih oblika nasilja nad ženama i uznemiravanja žena u Bosni i Hercegovini, dostavlja se

Na osnovu člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22), podnosimo Prijedlog rezolucije o sprječavanju svih oblika nasilja nad ženama i uznemiravanja žena u Bosni i Hercegovini.

Predlažemo da se u dnevni red 10. sjednice Predstavničkog doma Parlamentarne skupštine Bosne i Hercegovine zakazane za 22.08.2023. godine kao dodatna obavezna tačka uvrsti **Prijedlog rezolucije o sprječavanju svih oblika nasilja nad ženama i uznemiravanja žena u Bosni i Hercegovini.**

U prilogu dostavljamo tekst Prijedloga rezolucije.

S poštovanjem,

Poslanice/i SDP BiH u Predstavničkom domu Parlamentarne skupštine BiH:

Jasmin Imamović

Saša Magazinović

Rejhana Dervišević

Albin Muslić

Ermina Salkičević-Dizdarević

Imajući u vidu član II./3. Ustava Bosne i Hercegovine kojim je propisan katalog ljudskih prava i sloboda, prvenstveno pravo na život, pravo na ličnu slobodu i sigurnost, pravo na privatni i porodični život, dom i prepisku, pravo na brak i zasnivanje porodice i pravo na imovinu;

Ističući da je u čl. II./ 1. i 2. Ustava Bosne i Hercegovine (Ljudska prava i osnovne slobode) propisano da će Bosna i Hercegovina i oba entiteta osigurati najviši nivo međunarodno priznatih ljudskih prava i osnovnih sloboda, te da se prava i slobode predviđeni u Evropskoj konvenciji za zaštitu ljudskih prava i osnovnih sloboda i u njenim protokolima direktno primjenjuju u Bosni i Hercegovini, kao i da ovi akti imaju prioritet nad svim ostalim zakonima;

Polazeći od Deklaracije o uklanjanju nasilja nad ženama, donesene od strane Generalne skupštine Organizacije ujedinjenih nacija 1993. godine i Konvencije Vijeća Evrope o sprječavanju i borbi protiv nasilja nad ženama i nasilja u porodici iz 2011. godine (Istanbulska konvencija), koju je ratificirala Bosna i Hercegovina 07.11.2013. godine;

Svjjesni da su fizičko, seksualno, psihičko i drugi oblici nasilja nad ženama, uključujući i femicid, kao i uznemiravanje žena prisutni u većini zemalja i društvenih zajednica na svijetu, a i u Bosni i Hercegovini;

Konstatirajući:

-da su žrtve nasilja i uznemiravanja i počinitelji navedenih delikata osobe svih dobni skupina, obrazovanja, i položaja u društvu i da nasilje ostavlja fizičke i psihičke posljedice, narušava zdravlje žena i djevojčica,

-da je femicid, kao najekstremniji oblik rodno zasnovanog nasilja prisutan u društvenoj zajednici i da se femicid razlikuje od drugih oblika ubistava, jer se radi o rodno povezanim ubistvima žena samo zato što su žene ;

Upoznati sa time, da postoje određeni mehanizmi za zaštitu žrtava nasilja i uznemiravanja kao i određene vrste podrške ženama žrtvama nasilja i uznemiravanja, ali isti nisu adekvatni ili se ne koriste dovoljno;

Svjjesni da se žrtve nasilja i uznemiravanja u najvećem broju slučajeva ne obraćaju za pomoć i ne prijavljuju nasilje i uznemiravanje, zbog straha, prijetnji od počinitelaca, osude društva, nerazumijevanja i stigme od strane sistema zaštite i drugih individualnih razloga;

Prepoznavajući trend povećanja delikata nasilja nad ženama u Bosni i Hercegovini, koji svaki put kada se dese, opravdano dovode do velikog uznemirenja javnosti;

Na osnovu člana IV./4. e) Ustava Bosne i Hercegovine, Parlamentarna skupština Bosne i Hercegovine i člana 163. Poslovnika Predstavničkog doma Parlamentarne skupštine Bosne i Hercegovine ("Službeni glasnik Bosne i Hercegovine", broj 79/14, 81/15, 97/15, 78/19, 26/20, 53/22) na _____ sjednici Predstavničkog doma, održanoj _____ 2023. godine, usvojena je

REZOLUCIJA
O SPRJEČAVANJU SVIH OBLIKA NASILJA NAD ŽENAMA I UZNEMIRAVANJA ŽENA U
BOSNI I HERCEGOVINI

1. Predstavnički dom Parlamentarne skupštine Bosne i Hercegovine (u daljem tekstu: Predstavnički dom) oštro osuđuje svaki oblik nasilja nad ženama i uznemiravanja žena i apeluje na nadležne pravosudne organe, da preduzmu hitne mjere u vezi sa procesuiranjem delikata vezanih za nasilje nad ženama (ubistava, tjelesnih povreda, fizičkog i psihičkog zlostavljanja i uznemiravanja).
2. Predstavnički dom traži od Vijeća ministara Bosne i Hercegovine i drugih nadležnih organa, da u skladu sa svojim nadležnostima pristupe izradi dokumenata vezanih za definiranje sveobuhvatnog okvira politika i mjera za zaštitu i pomoć svim žrtvama nasilja nad ženama, uznemiravanja žena i nasilja u porodici na način da se u potpunosti implementiraju odredbe Konvencije Vijeća Evrope o sprječavanju i borbi protiv nasilja nad ženama i nasilja u porodici (Istanbulska konvencija).
3. Traži se od Vijeća ministara Bosne i Hercegovine i drugih nadležnih organa, da pokrenu kampanju na jačanju svijesti o sprječavanju nasilja nad ženama i uznemiravanja žena u Bosni i Hercegovini.
4. Preporučuje se organima nadležnih nivoa vlasti da pristupe izmjenama krivičnog zakonodavstva i femicid definiraju, kao posebno krivično djelo, imajući u vidu da je femicid najekstremnija manifestacija nasilja usmjerenog prema ženama na osnovu njihovog rodnog identiteta, rodnih uloga i nejednakih odnosa moći unutar društvenog konteksta, odnosno ubijanje žena koje vrše muškarci, motivisano mržnjom prema ženama, prezirom, kao i osjećanjem vlasništva i nadmoći.
5. Traži se od Vijeća ministara Bosne i Hercegovine i drugih nadležnih organa, da uspostave učinkovitu saradnju sa odgovarajućim nevladinim organizacijama i organizacijama civilnog društva aktivnih u borbi protiv nasilja nad ženama i uznemiravanja žena,
6. Predstavnički dom traži od svih organa i institucija na nivou Bosne i Hercegovine, donošenje Etičkih kodeksa ili njihovo usklađivanje sa međunarodnim konvencijama, Ustavom BiH i zakonima, kako bi se i na ovaj način preduprijedio i sankcionirao neprihvatljiv način ponašanja u obliku nasilja, uznemiravanja ili bilo kakve diskriminacije po osnovu spola, naročito prema ženama.
7. Ova Rezolucija stupa na snagu narednog dana od dana objavljivanja u "Službenom glasniku Bosne i Hercegovine".